

Komesar EU za proširenje na ženevskoj konferenciji "BiH deset godina od Dejtona i poslijе"

BiH potreban Ustav za EU



Za zemlju koja želi da se priključi EU neophodno je da napravi ustavni aranžman kompatibilan EU. Komisija i ja ćemo učiniti sve da olakšamo evropsko putovanje BiH i u tom kontekstu BiH je neophodna ustavna evolucija, ali ne ustavna revolucija, poručio Ren

Sa konferencije o Dejtonu u Ženevi
FOTO NN

Od specijalnog izvještača iz Ženeve:

Almedin ŠIŠIĆ

ŽENEVA - Oli Ren, komesar Evropske unije za proširenje, izjavio je juče u Ženevi da bi Evropska komisija u narednih nekoliko dana trebalo da dobije mandat za otpočinjanje pregovora o Sporazumu o stabilizaciji i pridruživanju BiH i EU.

Govoreći na konferenciji u Ženevi "BiH deset godina od Dejtona i poslijе", Ren je ponovio da bi pregovori između BiH i EU trebalo da počnu do kraja godine, najvjerojatnije 12. decembra.

"Za zemlju koja želi da se priključi EU neophodno je da napravi ustavni aranžman kompatibilan EU. Komisija i ja ćemo učiniti sve da olakšamo evropsko putovanje BiH i u tom kontekstu BiH je neophodna ustavna evolucija", poručio je Ren.

Evropski komesar za proširenje je dodao da su ljudi u BiH ti koji moraju donijeti odluku o ustavnim promjenama, ukoliko žele da država krene prema EU.

"Dvije su ključne stvari na tom putu. BiH mora racionalizovati skupu birokratiju jer će

to ograničavati pregovore. Uloga visokog predstavnika do sada je bila korisna, ali je došao trenutak da BiH preuzeme veću odgovornost za svoju budućnost", kazao je Ren.

On je na kraju istakao kako je pregovaranje bilo koje države s Evropskom unijom nemamisivo ukoliko ima visokog predstavnika s bosanskim ovlastima, ponovivši još jednom da BiH treba ustavna evolucija, a ne revolucija.

Predsjedavajući Vijeća ministara BiH Adnan Terzić izrazio je uvjerenje da će nasljednik Pedija Ešdauna biti posljednji visoki predstavnik u BiH.

"Želimo da brzo i efikasno pregovaramo o Ugovoru o pridruživanju i to je apsolutni prioritet bh. vlasti. Nekoliko godina se vode polemike koja je izlazna strategija međunarodne

zajednice u BiH. To je Ugovor o stabilizaciji i pridruživanju", istakao je Terzić.

"Vjerujem da u ovakovom ambijentu BiH može do kraja 2006. godine potpisati Ugovor o stabilizaciji i pridruživanju", doda je Terzić.

Jedan od domaćina ženevske konferencije, švajcarski kancelar Freni Miler-Hemi, zaključila je kako se radi o ključnom trenutku za BiH treba ustavna evolucija, a ne revolucija.

"Zaista vjerujem da BiH ima blistavu budućnost i isto tako vjerujem da će Ženeva poslužiti kao put BiH od Dejtona do Brisela", kazala je ona.

Podsjetivši da su u BiH provedene "vrlo važne reforme", ministar vanjskih poslova Švicarske Mišelin Kalmi-Rej smatra da su BiH nužne ustavne promjene.

"U taj proces moraju biti uključene sve strane, svi narodi. Uskoro će doći momenat kada će se Ured visokog predstavnika međunarodne zajednice transformisati u Ured visokog predstavnika EU i to će biti kraj dejtonskog procesa", naglasila je Kalmi-Rejeva.

Svi učesnici konferencije izrazili su zadovoljstvo što se na jednom mjestu okupilo blizu 500 stručnjaka, diplomata, ambasadora, političara i nestrašnica eksperata s jednim ciljem - približiti našu zemlju EU i iz procesa stabilizacije pomoći joj da uđe u proces integracije.

Tako je bivši visoki predstavnik Wolfgang Petrić i predsjedavajući Savjetodavnog odbora Asocijacije BiH 2005, koja je organizovala ženevsku konferenciju, zaključio kako se radi o ključnom trenutku za budućnost države, a nekoliko govornika je dodalo da je konferencija organizovana u najbolji mogući moment.

Konferencija "BiH deset godina od Dejtona i poslijе" biće završena danas, a nekoliko stotina njenih učesnika kroz 12 radionica pokušalo je da da odgovore kako ostvariti ukupan napredak društva i u oblastima ekonomije, pravde, edukacije, kulture, izgradnje države u cijelini.

BiH u NATO-u možda 2008. godine

Predsjedavajući Vijeća ministara BiH juče je otkrio "detalje svog nedavnog razgovora" s generalnim sekretarom NATO-a Jap de Hopom Šeferom.

"Generalni sekretar NATO-a mi je obećao kako je Alijansa spremna BiH primiti u članstvo već 2008. godine, ukoliko brzo i efikasno posložimo svoje društvo po evropskim standardima. Ovo je velika vijest za BiH", kazao je Terzić.